



08381

農丈人文集卷之五目錄

序十三首

贈憲使李公入覲序

贈明郡伯張公入覲序

送左叅伯謝公入賀 萬壽序

送南大司空楊公序代作

贈少司空陳公擢南大司寇序

贈寧夏巡撫僉都御史梁公還院改左序

贈巡海使者葉公移鎮北平序

農丈人文集

目錄卷五

一

送都水大夫陸君督學山右序代作

贈分陝使者原公晉山西副臬備兵昌平

序

贈左轄姚公晉副都御史巡撫寧夏序

贈陝臬長艾公晉右方伯序

贈陝右轄艾公改山右左轄序

贈浙藩左方伯史公遵詔推恩三代俱從

二品序

農丈人文集目錄卷之五



農丈人文集卷之五

古鄆余寅僧杲著

序十三首

贈憲使李公入覲序

令甲行部大僚凡三載必入覲於是雲杜李公以總浙臬祇述其所封守凡兩歲恪循厥職以共常事禮也於是或謂寅也雲杜公不瞻闕廷二十幾年矣夫其篇藻瓌麗照爛天漢間猷慮沉遠大抵酌土所宜規世所希有宣炳半寓內

農丈人文集

卷五

一

無不樹章畫以貽其後人以今方國無敢稱顏行焉濟濟內僚且推而讓登即秩宗端揆不虛矣寅應之曰固也顧此非可以聞之公也公盖有大志嘗監於宇宙盈虛之運皇天后辟升降湫億之林以顯固博碩之脉而堊厚散越之歲所謂貌亦益玄髮曾亦益白首方且厭實之殷礪而何遑乎名之顯融故斯語非可聞之公也或又詰寅也然則何以贈公夫臬猶司疆者也

吾將與公談疆事疆事不專倚公公伉執有輔

我以園通搏擊有贊我以縱捨不虞遭遽初亦
紛駭迺令閭閻號為寧輯無或囂突至於莫可
控公斯恩斯威斷斯謚斯大都以他郡國見公
功又率有相杵者吾敢譽公夫至於不敢譽公
而吾與公兩人之戚彌甚夫寅東海疾憊人也
吾欲與公論於方之內而性悖方又不習忽自
託於誕曼或者公日夜撫心者乎或問曰雩與
霧有辨乎余曰無辨也問者曰蓋聞之天閭而
地不訝雩應之地關而天不決霧應之厥象犁

農丈人文集

卷五

二

然安謂無兮邪余曰吾固哂吾悖也然則蒼莽
蓋亦有烟煴時邪古有言形莫若就氣莫若和
以今而觀混若無復倪可謂和之靡若無復骨
可謂就之然而細苛不蠲曠蕩不流天多寬言
地多噫氣則諸公不善承 德意之過也昔我
高皇帝燕坐便殿忽聞履聲問知危太樸也怒
逐之守皖祠太樸履何遽不及鄭尚書公絢飾
誠華猶與苴蒯等無從窺紫垣即拾級而登至
闕則止安得使此聲徹於

主上之聽異哉頃者漁陽傳本常不頓首青蒲
上而跪顙午門雖褫爵卒行其言都人士無
不頌

主上聖者夫諸公言盡矣力猶似未盡也易期
蒼遇嘉牖納此迂者常談要之權略終不外是
公茲行意者咫尺為回萬方重有造儻可幾乎
夫魯陽揮戈日為之返三舍謂之神勇夸父逐
日莫林道暘卒棄其杖為鄧林謂之愚勇公負
大志襄之以大力其濟蒼生之福也赫赫

農丈人文集

卷五

三

九廟寔靈承之不濟則鄧林在焉所謂其愚不
可及也以是贈公曰誕曼曰匪誕曼公其自擇
焉夫寅也胡敢知

贈明郡伯張公入覲序

今天下郡邑長吏任職久大都踰五年少亦不
下四年始擢去爰是吾郡長洲張公再入覲云
始公之覲也余在秦聞公以上家註考夫何翼
而蜚數千里外充於吾耳蓋聲與其實偕如此
是時公蒞吾郡才滿歲耳今既滿考又踰一歲

美績用大奏益章徹於四遐不識天曹何以稱
塞公往也幸獲從公之後周旋玄雲署中事無
巨無迫無疑無大璫無魁脊宿猾咄咤辦矣當
是時余操寸管彊為不急之語酬應一切或笑
曰豈儒無用而公敏給詳委幹略鮮與埒嗟乎
天曹豈應置公窮海滄溟之區乎公來而吾郡
遼游侵粟石至錢二十萬口靡控乃或望門橫
逞公煦以隱惻亟為糜濟之而厲禁無群置里
巷塞戶掠奪人請便宜假巡海使者符轉粟東
農丈人文集 卷五 四

嘉海以棊道殪而以其羸舉百廢以故郡迄無
轉徙而諸庾豐拓如舊識者謂公慮遠發策長
也公嘗慨然而歎古牧伯綱紀其封內徒恃三
尺耳吾懼何術以信於諸友寮於郡之父老諸
弟子直操此惴惴不敢有他是故引繩摘劾無
左右顧而民見直強擊自遂終不輒其始而民
見介以比周進般散退非復曩者杳然廳事前
也而民見巖當公沉默鄭然如石既揚眉朗爍
腹可披而視也是故神采霍如堂皇有截卒無

伎慳不肅迺令者雖吾郡易為理非公疑不及
此於是邑大夫華君其黃君其崔君其罄然向
余謝余語庶幾似公然特三歲前頌語請進之
吾所窺公其大者止此吾何以進公無已其漢
之故乎昔者袁汝南祭遼左俱以勞勩拜錢帛
之賜我國家於計臣業行之公前所寵被視
兩公更有加其國家之故乎正統間不靳三
品祿特賜姑蘇吉安兩郡公近歲間一詔之行
且見公乎然烏可幾吾固云公且擢去不再來
倘以邑大夫之靈天不遽棄我郡人得視况陳
兩公乎郡人幸甚邑大夫聳然而俯曰豈其然
遂書以贈

送左叅伯謝公入賀 萬壽序

今甲每歲

上誕辰行省外臺暨都閫三執事者奉表入賀
萬壽於是今年己亥當塗謝公敬共厥事以往
禮也夫浙首藩也以次公宜首外班唐家朝會
於元正長至禮較脩顧獨以古人臣無賀其君

生日者於是韋綬之議寢不行夫唐虞遠矣稽
顛而歌喜起何云乎夫壽亦大昕堯之一事也
江漢之篇曰虎拜稽首天子萬年夫忠臣祝君
何必不於生日漢家未央宮成高帝奉玉卮上
太上皇壽殿上皆呼萬歲至唐文皇命嘗未央
宮置酒奉神堯皇帝極夜乃罷臣子等爾安知
非生日事邪 國家於是日不做前代設壽樽
者如設壽樽許外臣以次進公固宜後上公首
奉觴已迺茲日紫禁在天赤墀在地萬靈雲集
集於莽蒼

農丈人文集

卷五

六

皇帝秉圭合契休息乎無為蓋中不必稱嚴外
不必告辨為閔已甚公俯躬端笏寧獨無深惟
焉不佞寅竊有請於公也今海內皇皇萬人所
亟繫其何屬古者上公及諸侯卿大夫覲君必
載贄故五玉已於事而返之示天下以潔清故
三帛已於事而不返之示天下以恭慤公今之
侯服之首臣也宜何贄或曰 國家不設樽即
不煩贄雖然茲行乎獨棗一赫幟即可語成事

而退邪臣請陳其槩昔者黃帝鑄鼎故採於首
山以臣固陋心不鑄鼎何損於明德黃帝無乃
過歟至禹湯實鼓鑄莊歷二山以救幣而振人
之無饘鬻妻孥者非若後世勤西邸號私藏也
聖度廣遠眇末烏能測知迺堯又捐金於淵舜
抵璧於谷蓋曰長物何足珍 陛下將法堯舜
邪廉儉彰矣法禹湯邪慈惠博矣萬無法黃帝
作無益事也公旬宣東越無徒以赤堇竭若邪
涸私丐於

上止為二郡請命也即杭聲而切近事庸非蓋夫
採山無宜侵五嶽五嶽帝輔即風雨時福祚長
權水無宜冒四瀆四瀆百谷王即寶藏繁興滋
息孔厚由斯以談其收孰多顏鑒於古之盛帝
以道德為富無過自封且 陛下何不令百執
事若臣者一覲威顏謹効之在前公服官嚴所
部為肅茲任宜有以靖獻贄孰是大於是前署
鄞今署慈谿某別駕某奉化某令某定海某令
某署象山教諭某今署鄞訓導某聞某是語謂

公必有當於

上心渙然下詔與天下更始

皇帝千萬歲臣拜執金吾真其日矣夫五王三
帛寧云寶乎遂登之文錦侈之祖道之左

送南大司空楊公序

代作

向吳楊公為少司空三年滿考無幾何擢南大
司空是時不佞寔長冬官而公與越州金公左
右貳會宮府役興隨以畿壤溝封周城傳堦費
無慮數十萬不佞日按行道上董終諸役寔賴

曲農丈人文集

卷五

八

二公輔不佞不逮二公日亦劫莖在事且 壘
書固專勅公公獨置之南去人臣不言勞然固
南也即事事定不得視 輦轂下柰何獨優假
公當

世廟末年公為都水郎膚施楊公為屯田郎而
余為營繕郎才十許年耳膚施楊公大司馬余
待罪大司空而公拜南大司空蓋一時希有事
也顧獨假公南去固謂公敎歷久嘗保釐江以
西尹南京兆屢年大有勞勤宜稍令息肩庶幾

葆畷靈爽永係海內之望夫虜施楊公獨非蒙
冒沙磧必計萬全以讐辜奪虜人俾之永永不患
我疆場其功不在公下然顧獨假公昔者成周
蓋未嘗都洛然必使召公營洛既營洛又必使
周公治洛留都固周之洛邑也洛不備官留都
備官其事不專倚公

文皇帝既都行在二百餘年無更詔營留都者
比歲旋葺旋止無都下諸大上役即或有一亦
不過從六卿後呼諸曹受記已爾二公居洛安

農丈人文集

卷五

九

得如公逸大臣於天下事無所不得任當其猛
厲決起即星辰避行江河讓駛矛戟頓鏑鬼神
匿響顧風烈無取太洩越此如繁弱忘歸世莫
不稱良然過用則勾撥乘之故無若姑毀之而
姑俟之公英敏捷給視天下事無不如其意所
出而又跋履中外幾三十年夫理解輒用芒刃
龍髯輒用斧斤公無不勝之者然懼其為之質
者鮮甚也語曰張而不弛文武不能也弛而不
張文武不為也一張一弛文武之道也故嘗謂

北都諸臣似大軌南都諸臣似大矩軌圍而動
矩方而靜

主上優假公意在茲年適者

主上閱凌公勞於百粵久詔凌公以大司馬居
留都意在息凌公而又閱潘公勞於江淮久則
詔潘公以大司馬居留都而令凌公總督江淮
意又在息潘公夫非獨爲二公地也國家所恃
命饒與戎兩事而已潘公習漕使益習兵故饒
事無祥虞凌公習兵使益習漕故戎事有伐謀

農丈人文集

卷五

十

兩公迭作力又迭息之以厚完其鋒銳使不跲
於缺斲用大臣有機權貴在翁張之其道蓋是
主上視公與兩公等故優假公至意於兩公益
徵之夫召公居洛其後成王召召公入而命周
公居洛頃之

主上且召楊公入誰當南不佞何敢視古人乃
獨希厚幸庶幾優假不佞南意寔津津願之矣
贈少司空陳公擢南大司寇序

南大司寇闕朝議以溫陵陳公名上俞焉前是

公為少司空凡兩年是時寶城役竣有闔於
上心詔晉公秩二等有闕輒畀公於是公遂南
夫仕安問南哉夫誠藉龐厚以訓正人族而嘗
為德者惜南誠藉智諳以懋建功庸而嘗為才
者惜南夫南何不可哉乃茲於陳公蓋數數有
溢意焉今

天子仁聖壹崩峭刺之習沛發德音既蠲既賑
令無決今年係囚禔福寓內可謂優鉅乃所析
楊重者踰十鈞遠者匝一時齒豁無不糜鑠者

今或兇殘洊加天倫至得偷館歲月於都官之
狴即斯一類固足以干陰陽而召災疹已漢人
蓋云前王所是著為律後王所是疏為令三尺
安從當時而是耳今律之抵人也若逃令之逮
人也若迫似非古者祥刑之旨臣安敢及是語
正謂公夷坦率直絕無扁閉居嘗好翽翽人不
翽其口操苦無所紛華論議熬無所徇假夫特
無敦士有斯必斯愍矣特無貞士有斯必斯諱
矣蓋冀公且北而為斯人請命也南得無不盡

公邪吾不暇遠引即南大司寇自國初迄今無慮八十許人其勲茂光伐載在彛鼎自耿清惠何文肅戴恭簡聞莊簡屠簡肅及陳新淦諸公不盈十人如公直躡武追之何難者顧諸公所以規摹一世震曜方未大抵翔翥在北公之宦蹟率在南及秉鉞而出又大江之介曩者雄風獨駕今者白日滿於除君子謂

主上無寧錄公而遠繇公也昔者召公營洛則周公留而輔豐周公治洛則召公歸而輔豐二

農丈人文集

卷五

十一

公所為稱萬世碩輔不以洛然固居洛也則無問乎公之南矣公誠長者吾聞長者抱醇度挾訐謨不以旦夕程功迺卒莫在其右者故公躡武從諸公起直卜之今茲耳公平生不喜謾余亦不習為諛請以諗之他日皆質語也云

贈寧夏巡撫僉都御史梁公還院改左序

南陽梁公以右僉都御史開府朔方三年威信大著虜酋懷服黃河若斬賀蘭山若扃不犯於

封守

天子曰此社稷之衛也不宜久淹荒徼於是召
公還院改左則古所謂大司憲也曩者公以都
給事中參藩政於是公去

天子左右十幾年矣茲召還固且以積瘁姑逸
之邪抑重有注也公視今日時事向似八九年
前公壯志不獲大展於司諫時夫司諫得言不
必得行司憲不但得言又無不得行故曰

天子重注意公八九年前當國者尚諱操下切
百執事皆尚默今尚寬傳人執其是而主者擇

農丈人文集

卷五

十三

焉皆尚盡實生晚無素於閎達之觀而祇以其
臆念也黷焉君翳其目莫敢造從竊願請於公
也聞之一心可以事百君百心不可以事一君
是故介者務止其守官也不踰垠域愒者務溢
其守官也嘗多畔援此百執事之槩也今天下
京大不過五六事大都嗟吁而不敢及躊躇四
顧而不敢發然皆有象可指非若過天倍情入
於支離之舍而出於倏忽之鄉以妄為常非物
可方斯甚也夫白日經天何所不朗徹大五行

地何所不磅礴而直為此回適一人導之舉世靡焉數年來此風亦頗衰息詩曰士也罔極二三其德顧不足甚慮邪夫邊不戢圻父以告水不靖宏父以告籟不給司農以告律不舉司寇以告宄不詰司隸以告皆有尋丈以詔於

天子公歎何討焉寅不能談遠事猶憶近者歲甲申召山東丘公及大名石公入院二公上疏糾切官邪甚具寅讀之大恐若疚於厥躬是時姚江趙公總院事今天台吳公代其位不知嘗農丈人文集

卷五

十四

具疏然二公丰采峻整朝端肅清古所謂邦之司直奚讓焉又其後洪都魏公閩詹公迭入院又皆有疏

上又亟行之曰是不淺昆輔我公茲行必備言今日所急安在者公濶達亮直鑑照甚精所行事壹如所自盟無敢毫髮干其間者夫獎貞白斥比周綱紀在前繩約居後無俾熒惑蠱我皇路即

主上加尊朝廷加重真公今日之事矣寅書生

語迂不足當公於是藩臬諸大夫及二三諸閫
謀所以贈公者輒用斯語佐觴竊願請於公儻
不謂迂也否

贈巡海使者葉公移鎮北平序

巡海使者葉公視師浙以東之又明年 詔以
本秩備兵北平夫公駐節海上才兩閱孟陬耳
遽移之北

上豈不念東人顧吾以 陛下為神聖矣往互

市議起在廷諸臣無不人人稱便者獨巡海公

上書爭之曰左執政弗善也於是左遷公今互
市十餘年迄無恙督撫諸公無不嬉愉誇負功
能取大賞以去安見其左且也廟堂又復略其
往也之類而收之吾聞之卓詭無垠沉深有倫
是故君子揆策人國有衆人不悟一人乃悟之
有當日不効千日乃効之今乘塞者恨莫能一
當虜若遼左既得當虜矣薄創之報鹵獲厚創
之報俘馘乃議者又引繩而搏之然則必務撫
之無取創之若今茲斯快邪是故忠賢之佐必

察於戎機何若於國體何若於物力何若然後
有弗讐何弗吾懾焉有弗鞠何弗吾庇焉今三
者竟何若矣夫十年何足見巡海公使行之百
年無恙巡海公之言益信耳甲令三年必令憲
臣巡察徵上諸所堅瑕以聞嘗取諸憲臣報疏
讀之於前三者或激及之或弗及之然則在廷
諸臣何但曉諭斯故而巳故曰惡姑弛之必或
張之惡姑伏之必或奮之公茲北意者

主上萬一振諸邊乎故吾以陛下真神聖矣

已持是語語吾郡太守蔡公曰此謂諸邊耳公
之繇在北平請言北平吾觀公北平不足為也
公魄盛英槩滿於海上竄注意兵餼無闕月校
習精賞罰信一時耳目為新諸伍嘗以艤艫貸
官為之負帑金至萬三千積不能問公責之償
其頤如響又注意民訟牒不以情百訊不止公
志亮潔皦日在天與之談風在几席間所譬畫
一準於正經既定屹然不可動搖邇又以捕海
者率中夷用什伍法繇之官與之械使漁自為

防諸兵不得詰問惜公去不獲率功夫以吾海
視遼海以吾海上諸險視榆關諸隘於公何有
矣前歲吾友顧益卿駐杭已駐薊或謂是土善
釀意以益卿又善投壺祇用大斗佐多馬已耳
此特慨時語人臣朝夕顧諟簡書宜如何盡瘁
詩曰予手拮据予所枵荼予所畜租予口卒瘁
爰是說即萬無抵禦亦固業業不皇暇暇向尊
壘取耽湏哉復以語蔡守公曰然請更進之夫
塞事即塞堡器具糗糴諸等渴者所玩視老成
人率置力焉無庸談無已其虞學士所謂水田
乎虞所議勝國忽之後稍一行焉輒效西北邊
無不可行者愚獨謂宜自公公一代雄傑氣銳
有心計忠懇自其性然夫天下事以虛鼓焉者
未有能得實應者也無論文墨之吏議我短長
且先自謾矣烏乎與成大事往者鳳陽之事可
鑒已太守求所以贈公意甚盛寅也鄙無能闕
其大者僅持是說進夫國家萬世治安必此焉
繫真第一籌也姑無論假我便宜借我歲月公

且往而試其可乎夫蔓然而以煩事必去之闇
然而以安功必集之若公萬無所謂不可者嗟
乎又况乎

主上神聖在也

送都水大夫陸君督學山右序代作

上之八年余從御史大夫來長冬官是時高堰
後竣論諸執事功於是首推都水大夫陸君得
食俸正四品明年六月大夫凡歷俸七年有奇
以資擢山西副臬即視學當

農丈人文集

卷五

十八

穆廟時余亦絲繕部郎視學關中蓋莫不謂華
迺殊不識吾兩人在事固大艱難也夫高堰猶
謂坐籌耳人臣研精洞矚與議廟堂之末竟效
萬里

主上蓋曰若以尺寸效我我必以尋丈報若故
眉信臆張計無不可得闕決者陸大夫也且也
微獨斯堰今廟堂所崇在節約所責在實大都
使

主上質有令名用還海內醇厚抑絕諸請借以

杜僥倖之源而已屬者詔績諸黼衮稍踰常額
余執不下大夫具䟽請曰吳浙洊灾杼軸大困
不勝愈益繁靡如必不得已者請以南水衡錢
即領於縣官為之便余為聞不獲 命余且䟽
且請願捐其羊亦竟不獲 命也初大夫以都
水郎出視夏鎮凡三年而入為屯田郎又由屯
田再為都水故諸郎老於部事無若大夫大夫
真稱部掌固美部掌固於夢錯無不辦也又大
督徵暖即勾稽諸籍必謹以付威蕤鑰善緣法
不遑為膠莫即中貴人以私謁必謝曰有主者
嘗曰吾屬孰非嚴事大司空者烏取狗謁者溷
諸君為故無苦諸賈因與諸賈市無咈諸貴人
因與諸貴人市無霄諸計吏因與諸計吏市大
夫誠母之前是郡國有賦其土入者援故事願
得改折贏其直上之大夫不可此 天府旦暮
所須而曲為奸者主逋議終大夫去幾報寢夫
是蓋往余所不得堪寧與大夫有二也大夫一
日而謝抱牘旁午縱橫握筭之徒而與章甫逢

掖雖容而質雅義又往余所不得當乃今於大夫行私心髦髦艷之誠有概於大夫蓋博取量而厚引規乎夫善閱必不得加之譬輝善銷必不得施之桂馥 國家用大夫蓋用大夫之著者久顧大夫平日所為守 國家財如其法守法如其官守官如其身良足述也方念夫以尋丈報大夫伊茲始耳故謂茲擢華余往者誠不敢謂華謂且無華則大夫既食其實矣大夫益崇茂之庶幾其求有聞哉

農丈人文集

卷五

二二一

贈分陝使者原公晉山西副臬脩兵昌平序

分陝使者原公以部使者來鎮潼關是時關中洊饑民不堪命公宣

上德意壹志拊循關以內無不恃公朝夕者既三年聲迹蔚然有憫於河華之間甚著於是晉公叅藩稱分陝使者又一年又晉公副臬部署昌平蓋秩諸山右而屬之神京以此事於是公又稱脩兵使者余不佞嘗廁員曹郎凡扈 駕

天壽山者一陪春秋祀二隨大司空之後相擇
壽宮二蓋五過昌平矣當是時不見備兵使者
而見兵則嗥嗥洸洸白虹繞其組練而赤電爍
其戈鋌前茅騰只火烈轟只左轟翕只金聲鎔
只嘻哉乎宜

主上之內愉也抑貌爾不佞書生烏知兵其以
貌有任之者其不以貌有任之者固不獨在使
者顧今日飽飫諸士伍者誰也昌平大抵多客
戶鮮土著永樂初嘗徙天下富民實燕京昌平
去燕京七十里而遙勢不得籍昌平故督然寄
寓率以流輿戍至頃之肆青即四方散矣又或
治方中則商至役止又四方散矣其受屢長子

孫者凡幾戶矣且 長陵三駕 景陵三巡近

郊 康陵四度居庸關故綏輯昌平嘗後繹騷
昌平嘗先假令綰州符者侮矜寡畏強禦忍之
為魚肉助之為刃俎是備兵使者懣無已時也
然則昌平可知已邑居何幾視如墟井生齒何

幾視如浮鷗錢刀何幾視如飛藿此長者之所

甚念也人亦有言顛沛之揭枝葉未有害本實
先撥公其以吉心平集之而已今方中之作且
竣 駕且臨視徵發且旁午以二十率則司農
供七冬官供六京兆供五其二以擬昌平耳徃
者諸貴人遇大興作目輒眈眈視不廢食不止諸
將作無如何今聞董者頗戒食甚此於昌平亦
二十之一二溉也

天子恭默端居法宮雨濡霜浥至情悽惻然後
一行旋即還軫不浹旬日不敢假於

農丈人文集

卷五

二十二

祖宗銘清流穢名道彌陽和此真

聖主也使者何幸遭之夫以關中灾沴萬人洩
洩莫必旦夕使者悉意鞠摩之卒令左輔赤子
不沾於危亡况在輦下被除有徵寬綽有象

主上加意元元沛發德音所以噓植良至當事
者一有滋則百稱篤焉視左輔更易為惠公其
以吉心從諸父老殷勤撫問即喙息嚕動亦有
靈也公無忽諸不佞贈公止此若戎事其問諸

紫荆白羊之戍

贈左轄姚公晉副都御史巡撫寧夏序

寧夏蓋古朔方地云自漢攘斥羗戎河外唐築受降城驅蕃落蓋北於是朔方屏蔽關右稱雄鎮焉自赫連築統萬以居無何歲耳厥後拓跋據之幾與宋相終始別史記元昊世桀驁患苦宋宋終不能得其要領迨靈州永樂之役創彌甚如夏人殆非粵尉佗閩無諸滇莊躋諸小醜易與也雖其人之多技哉亦其地足用也今襄城姚公用其地矣敢問公烏乎用朔方夫朔方

所恃者非黃河與賀蘭山哉恃河而不備則套虜乘我恃山而不備則住牧之虜乘我夫河山障也非所以備也元昊一么麼子耳乃岝然負固與中國抗衡當是時幅幘萬里控弦之士八十萬於何取給焉即中國許通市歲賜不闕其濟幾何要之用朔方者厚也攷寧夏圖記取於兵以保砦取於屯丁以充伍取於無聽山右之徵調以恤軍其詳於兵也如是顧獨不及餉寧夏初行開中其後不以鹺軌而以銀糴於是商

不勝牧而責之民餉事蓋大無策矣邇聞開荒
三年羨銀一萬有奇粟二萬七千有奇人臣唯
不役志於疆事耳稍勉之輒大效使當事者仍
之歲歲富彊可立致秦諸鎮不患無田而患無
水環慶間有鑿地三百尺不得泉者寧夏多漢
唐故渠益支引大河如以膏沐畝鍾當倍他所
他所給於粟或不給於漕何夫之錫寧夏兩物
俱畀之其侈溢若是徃議扶風一郡改食池鹽
主者恐不給為常課憂夫謂董董池耳池以外

是土皆是物何患詘邪此兩者皆朔方所盛有
當路乃曰乏人為之夫鑿鑿非襍穢歟輶輶非
桔槔歟諸軍防河在冬冬農隙也春夏得從主
人課農兼課漕防山不過諸隘其不當諸隘得
解嚴而從農又從漕意當時元昊崛強靈武不
出此故曰朔方良足用也或曰古節制朔方如
張仁愿禦却虜如韓范二公龍服虜厥聲大矣
不以為姚公願迺嘖嘖元昊不置意者眇小非
倫乎夫數公信有聲然皆為朔方用非用朔方

者公端亮其行事操平致慎開布恩信收恤其
下他日當不讓數公吾直論事之大較若此夫
用河山之險為扞衛又因緣其利為精神吾知
公必有以辨此矣

贈陝臬長艾公晉右方伯序

吳淞艾公總秦之臬事既二年天曹敘公勞勩
先後秦凡六年矣於是晉公右方伯云余考秦
記牒若東鹿王公垣曲趙公萊陽曲公燕山翟
公鈞州任公皆由秦臬長拜御史中丞煌煌乎
農丈人文集 卷五 二五

烈矣公治勩不下五公胡不遂稱開府秉旄握
節大庇西土之人哉夫此 祖宗往事也
肅皇帝時猶能決涂批隘不以差次待一時之
豪有聲者故矯健者速得志而佻達者亦生其
心今當國者斤斤守法力行公道惟恐一日不
白於天下即有至睨不敢決隙而借之公亦不
願入其械中也非特此

主上厚有昵於今之開府曰不滿考不遽遷故
今之開府屏息而俟

主上庶幾俞我也不翅擊匹滿於浦激後集者
安所錯趾若是安得訟然而稱之曰前何淹今
後之也秦地大其人不特猛起又曠嘗伏狃嘗
竊發是有三邊四鎮八郡之重繫臬是賴顧所
恃惟歲耳歲一不登奚獨龐也吠將神皋陸海
無救立枯竊怪唐署考觀察使豐稔為上省刑
次之辦稅又次之豈所謂恃歲之說邪意是時
節度使統兵觀察使無理餉邪乃所謂省刑則
我 國家提刑之旨矣公簡靜務潔庶大較用

寬博略苛細慮囚大者安比小者平舍未嘗科
罰恣所析楊屬歲屢侵公約戒明閭里用輯以
故狃曠無敢淫逞者公坐堂皇堂皇肅出門而
四馳驟駢無謹此真臬主哉是歲也果豐稔刑
果省唐之所謂上冢臣其公邪或曰唐之故歟
柰何以祝今之在位者公其或者不敢拜吾子
之明賜也是何然夫觀察古之連帥連帥外監
諸郡國入則佐一人正與今之內臺埒唐觀察
吾不能悉舉獨李泌轉饜三門衛次公蠲橫錢

三百萬崔威裁剖若神皆著聲陝虢間儻似公
乎夫古今人豈遂相遠哉行且是矣則前五公
者誠不獨烈矣

贈陝右轄艾公改山右左轄序

今方伯蓋即古岳牧云舜十有二牧分冀州為
幽并并當全晉敵今山以西強半矣當是時稱
并州牧者誰哉當是時堯雖用櫟乎然瀕洞未
就夷龍門砥柱之土方興九州之屬不啻萬國
各以時覲并州牧於何取辦也禹貢於冀止敘

農文人文集

卷五

五二

田賦不及貢篚產三金不以治饑不權天府易
充而難誣如此及周之末金晉裂為三山以西
或屬趙或韓而北狄遂居雲中於是山以西不
幸邊虜迄於今岌岌如哺驕子恐一旦孽作而
供億遂益繁余嘗觀七國時軍其地即食其地
若李牧居鴈門租入盡歸幕府饗士漢魏尚之
守雲中也亦然唐李抱真練卒訓農屹然為澤
潞雄鎮蓋兵與餉猶總於一也至我國家始
專以餉事責之藩之長於是方伯持籌而校出

入不遑矣郡邑少愆期又走檄督責不遑矣夫財無足而能至者以有導之使灌輸耳今開中廢而飛輓無助於我錢旋行旋罷而鼓鑄無助於我郡邑帑藏索然如罄設不意旱澇頻仍蝥賊並作即桑孔復生亦且踟躕四顧莫可如何已雖然所患餉獨兵耳往山以西嘗怯虜故往往尤主餉者今虜弭其尾而乞我雲中悍卒嘗挾虜而誑既數創之亦既俯首聽我若然直一記曹之任耳夫當事者不惟程效難抑兼才難

也以公之精審而猶媿媿於夙夜一餉寧足勤公頃之公且開府文武大吏為公主餉為公主兵公寬厚昌博帥象太常而經垂特遠惟所宜之矣一餉果足勤公邪雖然今天下所患豈特郡邑如罄即齊民何所不若冠然夫蓋藏多則好義亦益多積聚寡則重生亦益寡是故不難以不逞名也而恣為之此非海內之隱疹也夫不諗於天下之大較而亟所宜先不可以明夙昔稱盛美公茲往特餉事而已乎語未已忽自

哂曰余過矣余過矣頃謂公誠計其大且遠矣於是說何有矣

贈浙藩左方伯史公遵 詔推恩三代俱

從二品序

蓋頃者臣寅伏讀 東朝暨 太母兩恩詔竊私忭舞魏乎烈哉適寧 九廟之靈而闡繹萬國之歡心永殿我不丕基薄海內外其誰弗踊躍謳歌者於是浙藩左使史公遵詔得推恩三代云前是公嘗握憲江以西以臬使家已拜三

代恩蓋三品茲再沐寵命則從二品云於是公友僚右使范公圖所以頌公者遣使者謂余我等一十有二人誼寔同無敢不恭恪子部民也顧獨無憂憂之衷以對揚我

天子休顯大命邪記曰有大福必脩禮以樂之禮寔在子其無靳一言之辱余遂不能辭余惟尚書四嶽尊矣即禪讓大事不以咨百揆獨咨嶽疑蔽座前無先四嶽者既分州十二置十二牧蓋即今之十三部雖廣輪奐不牢固猶唐虞

之故也大抵內統外則周召分陝稱二伯周官所謂方伯也外系內則漢稱尹稱司隸與諸侯王等唐稱節度末大而為藩鎮無論宰天下全與居天下半諸若疆土臚列命令浚宣固均之巨重已柰何恩數不隆異也史之先多聞人自廣武公肇作偕其弟南給諫公並聲而驅里人莫不指目之曰是篤天賜者迨鴻臚公嗣起游退齋甘泉兩先生之門守道之澹節約自維於時萬宗伯公與慶嘗歎以為吾黨師也其鍾也

如此宜必有受之者吾觀公初稱諫議作朕耳目既乃宣力奔奏作朕股肱方行天下殆半往之無不著績者公器度敦潛弘雅寬博高亮未嘗以聲色厲人亦不以假人暨於吾浙默而佐百需靖而救萬姓盛德在事山恃以寧謐海助以津潤夫四方大矣戴聖氏曰大臣慮四方則謂夫內之部之者也其誥多士曰俊民甸四方則謂夫部而外行之者也若公可謂能甸矣

主上藉此詔報公可謂不負公夫恩數胡可易

言也是故祿有及祖今爵及之美父或不及祿
今及爵矣母或不及例今例及之美凡皆天宇
方曠非唯雨之又大沛之昔者先王承天道以
治人情是故天有定命而人有大防赫赫彞憲
人臣不敢意焉及其發揚詡萬物蕩曼雲行時
溢於其域萬國式食斯之為盎然故曰禮時為
大順次之諸公所謂脩禮以迓福倘謂是邪夫
此天施不可易徼也在昔五長弼成九牧壤設
無不垂紳端笏羽儀天路光輔上京嘗聞富沙

農丈人文集

卷五

三十一

李公以方伯召為司成未幾即為太宰此吾浙
事若康僖陸公由方伯入為大司冠則吾鄞事
祖宗朝盛事多有蓋唯才是陟何嘗內外視今
之由左右使改御史中丞開府作鎮常調也夫
有非常之抱必有非常之遇公益思所以導揚
仁風厚迎釐祉 帝鑒日在茲必且大錄公以
風四方公其永勤相無忽焉

08381

